

## Sura ya 7 – Kupinga

Umewahi kununua kitu fulani kisichofanya kazi kisha ukaamua kukirudisha kwa mwenye duka? Hivyo ndivyo Wakristo wengi wanavyofanya. Wanasikia Habari Njema, lakini hawangojei muda wa kutosha ili kuona zikidhihirika katika maisha yao, badala yake huzirudisha kama kitu kisichofanya kazi!

**Wakati mwingine ni vigumu kuamini kuamini ukweli tusiouona na kuuhisi kwa kutumia milango 5 ya fahamu.**

**Hakuna Ushindi bila Mapambano** – Ni lazima tutambue kwamba tunaishi katika eneo la adui. Lengo la adui ni kuwafanya waliopotea waendeleo kupotea na kwenda jehanum. Lengo lake kwa Wakristo ni kuwafanya wavutwe sana na ufalme wa dunia hii na mifumo yake ya fedha, burudani, mamlaka, kupendwa na watu, na kadhalika, ili wasijue kwamba wanaweza kuishi katika ufalme ulio juu zaidi, Ufalme wa Mungu. Shetani hatumii kila wakati mambo “mabaya” kutujaribu, wakati mwingine hutumia mambo “mazuri” ya ulimwengu kutuvuta mbali na Ufalme wa Mungu. Shetani hutumia mazingira na mawazo kutudanganya kwamba HATUJAKETI pamoja na Kristo, na kwamba hatupaswi KUENENDA kama anavyoenenda na kwamba tunapaswa kukata tamaa badala ya KUSIMAMA katika ahadi za Mungu. Sisi ni warithi wa Ufalme wa Mungu, sasa kwa nini tuishi kama watu wasio warithi?

### **Kuzipinga hila za mwovu**

Katika Waefeso 6:11 tunaambiwa “Vaeni silaha zote za Mungu, mpate kuweza kuzipinga hila za Shetani.”

**Sasa kwa kuwa tunafahamu Kuketi (sisi ni nani katika Kristo), na Kuenenda (kuishi maisha yanayompendeza Bwana), tumejiandaa kwa vita vya kiroho, Kuzipinga hila za Shetani**



+



=



Msalaba wake + Msalaba wako = Ushindi  
Kuketi Kuenenda na Kupinga

**Mpango wa Mungu wa kushughulika na mahitaji yako yote ni kukupa tunda kutoka katika mbegu ya Neno. Mpango wa Shetani ni**

kuzuia tunda hilo kwa kuiba mbegu na/au kukufanya usizae. Kupinga ni hatua ya mwisho katika kuzaa matunda kwa ajili ya maisha yako. Kupinga ni kwa ajili ya wale tu waliopokea KUKETI na KUENENDA. Kupinga ni kushikilia kwa subira, uaminifu, uvumilivu na kuongea maneno ya imani hata kama mazingira yanaonekana kuwa mabaya, au hata kama unajisikia vibaya. Ni kuyatendea kazi yale uliyojifunza katika Kuketi na Kuenenda kila siku.

### Hivi ndivyo inavyofanyika

Yesu alikuwa akiwafundisha wanafunzi wake katika Marko sura ya 4. Aliwaambia kwamba siri ya Ufalme wa Mungu imo ndani ya mfano huu. Akawauliza katika mstari wa 13, “Hamjui mfano huu? Basi mifano yote mtaitambuaje?” Yesu alitumia mfano huu unaohusiana na kilimo, unaonekana kwa wazi, wa mbegu inayopandwa, ili kuelezea na kufunua siri ya ulimwengu usioonekana. Katika Marko 4:9-11 imeandikwa hivi: “Akasema, Aliye na masikio ya kusikilia, na asikie. Naye alipokuwa peke yake, wale watu waliomzunguka, na wale Thenashara, walimwuliza habari za ile mifano. Akawaambia, Ninzi mmejaliwa kujua siri ya ufalme wa Mungu, bali kwa wale walio nje yote hufanywa kwa mifano.”

**Ufalme wote wa Mungu unafanana na mfano huu.** Mungu hupanda mbegu za maneno yake ndani ya mioyo yetu (bila kujali hali ya mioyo yetu). Mbegu hizi zinawakilisha makusudi yote ya Mungu katika maisha yetu, kuanzia siku tunapozaliwa mara ya pili hadi tunapojazwa Roho Mtakatifu, kuponywa kimwili na kiakili, kupewa mahitaji yetu, kuwa na mahusiano mazuri kimaisha na kila kitu kingine ambacho Mungu anatukusudia. Yote hayo hufanyika kwa mbegu ya Neno inayokuwa imepandwa.

Neno la Mungu katika **Marko 4:14-20** linasema hivi “Mpanzi huyo hulipanda neno. Hawa ndio walio kando ya njia lipandwapo neno; nao, wakiisha kusikia, mara huja Shetani, akaliondoa lile neno lililopandwa miyoni mwao. Kadhalika na hawa ndio wapandwao penye miamba, ambao kwamba wakiisha kulisikia lile neno, mara hulipokea kw furaha; ila hawana mizizi ndani yao, bali hudumu muda mchache; kisha ikitokea dhiki au udhia kwa ajili ya lile neno, mara hujikwaa. Na hawa ndio wale wapandwao penye miiba; ni watu walisikiao lile neno, na shughuli za dunia, na udanganyifu wa mali, na tamaa za mambo mengine zikiingia, hulisonga lile neno, likawa halizai. Na hawa ndio waliopandwa penye udongo ulio mzuri; ni watu

walisikiao lile neno na kulipokea, na kuzaa matunda, mmoja thelathini, mmoja sitini, na mmoja mia.

**Umeona sasa kwamba Shetani huja kuliiba Neno.** Hii hasa ndio silaha pekee aliyo nayo Shetani dhidi ya wanadamu; kuliiba Neno au kutupofusha tusilione Neno (2 Wakorintho 4:4). Mtu yeyote akilipokea Neno la Mungu, ataokolewa na kwenda mbinguni. Mtu yeyote akilipokea na kuliimini Neno la Mungu, ataponywa roho, nafsi na mwili, atapata mahitaji yake, maisha yake yatakuwa mazuri. Shetani hawezi kumdhuru mtu yeyote anayeliimini Neno la Mungu. Anaweza (na ndivyo anavyofanya) kumjaribu, anaweza kumuwekea ishara zitakazolifanya Neno lionekane kana kwamba siyo la kweli, lakini hawezi kukudhuru kama umejitoa kabisa kuongozwa na Neno, na Neno ni Yesu mwenyewe!

Kila wakati tutahitaji kupambana na mambo magumu, hata hivyo tunaweza kushinda. Mungu mwenyewe ndiye anayetupatia ushindi. Mara nyingi mambo hayaendi kama tulivyopanga. Hata hivyo tunapaswa kumtumaini katika mambo yote!

**Shetani akiweza kukufanya uishi katika utu wa kale (kimwili) na kwa kuzifuata njia za ulimwengu,** anaweza kukuibia ahadi za Mungu. Katika Wagalatia 5:19-21 tunasoma maneno yafuatayo “Basi nasema, Enendeni kwa Roho, wala hamtazitimiza kamwe tamaa za mwili. Kwa sababu mwili hutamani ukishindana na Roho, na Roho kushindana na mwili; kwa maana hizi zimepingana, hata hamwezi kufanya mnayotaka. Lakini mkiongozwa na Roho, hampo chini ya sheria. Basi matendo ya mwili ni dhahiri, ndiyo haya, uasherati, uchafu, ufsadi, ibada ya sanamu, uchawi, uadui, ugomvi, wivu, hasira, fitina, faraka, uzushi, husuda, ulevi, ulafi, na mambo yanayofanana na hayo, katika hayo nawaambia mapema, kama nilivyokwisha kuwaambia, ya kwamba watu watendao mambo ya jinsi hiyo hawataurithi ufalme wa Mungu.” (Mbegu ya Neno ikizaa matunda katika maisha yako.)

**Kwa hiyo, kwa kutumia njia rahisi sana, ya kitoto, ya kuangalia vita vya kiroho,** hebu tulenge macho yetu kwenye silaha pekee ya Shetani na juu ya itikio letu kwa vitendo vyake. Vita vya kiroho, havijawekwa kwa ajili ya mtakatifu wa Mungu ambaye amekuwa akienenda na Mungu kwa miaka 20. Hapana, vita hivyo vipo kwa kila mtoto wa Mungu; na Mungu anatuwezesha sisi sote kupigana vita kwa nguvu na uweza wake. Hatuhitaji kuwa mabingwa. Kumbuka, Mungu humpa neema mnyenyekevu. Tunasoma hivyo katika Yakobo 4:6 “Lakini hutujalia sisi neema iliyo zidi; kwa hiyo husema, Mungu huwapinga wajikuzao, bali huwapa neema **wanyenyekevu.**”

**Kuna hatua ambazo Mungu anafuata katika kuleta  
mapenzi yake duniani**

**Inachukua muda kubadili matatizo yetu kuwa baraka, na pia  
inahitaji subira kuendelea kung'ang'ania hata baada ya  
matumaini yote kuonekana yametoweka**

Katika Luka 19:11-13 wanafunzi wa Yesu walifikiri kwamba ufalme wa Mungu ungekuja duniani saa ile ile na kwamba matatizo yao yangetatuliwa siku inayofuata. Akawafundisha wanafunzi wake somo linalokuhusu pia wewe na mimi.

“Waliposikia hayo, aliongeza kusema mfano, kwa sababu alikuwa karibu na Yerusalemu, na wao walidhani ya kuwa ufalme wa Mungu utaonekana mara. Basi akasema, mtu mmoja kabaila, alisafiri kwenda nchi ya mbali, ili ajipatie ufalme na kurudi. Akaita watu kumi katika watumwa wake, akawapa mafungu kumi ya fedha, akawaambia, **fanyeni biashara** hata nitakapokuja.” (Luka 19:11-13).

Akawasimulia mfano kuhusu mtu mmoja aliyesafiri kwenda nchi ya mbali ili ajipatie ufalme na kurudi. Akaita watu kumi katika watumwa wake, akawapa mafungu kumi ya fedha, akawaambia, **WAFANYE BIASHARA** hadi atakapokuja. Lakini wengi wao walichukua sana mamlaka yake.

**Kulikuwa na makundi manne va watu waliokuwepo siku aliporudi**

1. **Kundi lililochukia mamlaka** yake na ambalo halikutaka mtu yeyote awatawale lilifukuzwa mbali naye na kuuawa.

2-3. **Wengine WALIZIFANYIA BIASHARA** zile fedha. Kulingana na mafanikio yao walipewa fedha zaidi na kuzawadiwa mamlaka juu ya miji mingi.

4. **Wengine HAWAKUFANYA BIASHARA** kwa sababu walifikiri mtu yule ni mgumu na kwamba angewaadhibu kwa KUFANYA BIASHARA. Licha ya kutopata thawabu yoyote, fedha zao zilichukuliwa. Zitumie au zipoteze!

Nini maana ya maneno haya KUFANYA BIASHARA?

**KUFANYA BIASHARA ni kutafuta faida.** Kwa ufafanuzi zaidi, biashara ni kuchukua mali ghafi au huduma, kuongeza thamani juu yake na kuifanya iwe na faida zaidi ili iwe na manufaa au iuzwe. Ni

kubadilishana au kubadilisha kabisa kitu na kukifanya kuwa chenye manufaa. Maneno hayo yametumika katika Biblia kuelezea watu waliokuwa na biashara, mashamba yenye ng'ombe na biashara nyingine nzuri na mbaya.

Tunasoma katika **Mithali 3:13-15** kwamba “**Heri mtu yule aonaye hekima**, Na mtu yule apataye ufahamu. Maana biashara yake ni bora kuliko biashara ya fedha, Na faida yake ni nyingi kuliko dhahabu safi. Yeye ana thamani kuliko marijani, Wala vyote uvitamanivyo havilingani naye.”

**Tunapaswa kubadili matatizo yetu kuwa faida.** Tunapaswa kuchukua mali ghafi za matatizo na kuzifanyia biashara kwa kuzalisha baraka. Neno jingine ni kupatanisha, ambalo linamaanisha kumbadilisha adui kuwa rafiki.

### Mathayo sura ya 25 inafunua siri hii

**Mfano wa Talanta; Mathayo 25:14** ni mfano unaofanana sana na ule wa Luka 19. Mtu alisafiri akawapa watumwa wake talanta wazifanyie biashara hadi atakaporudi.

**Wanawali wenye Busara na wanawali Wapumbavu:** Katika Mathayo 25:1 tunaambiwa juu ya wanawali 5 wenye busara na wanawali 5 wapumbavu. Tofauti pekee waliyokuwa nayo ni kwamba wanawali wapumbavu walishindwa kuendelea kungojea muda mrefu wakati bwana arusi alipochelewa kutimiza ahadi yake. Wanawali wapumbavu hawakuwa na mafuta ya kutosha kuendelea kungojea muda mrefu.

Wanawali maana yake ni kwamba dhambi zao zilikuwa zimesafishwa mbele za Bwana. Kwa hiyo wote walikuwa wameokoka. Tofauti ni katika kuwa wenye busara au wapumbavu. Busara ni kumsikia Mungu akisema. Taa ni Neno la Mungu (Zaburi 119 na Mithali 6:23) na mafuta ni Roho Mtakatifu. Yote hayo yakijumlishwa pamoja yanaleta uvumilivu, subira, uweza wa kudumu na tunda la Roho. Wanajua kwamba Bwana wao atakuja kuwaokoa hata kama matumaini yote ya KIBINADAMU yametoweka. Wanaendelea kuyangojea yale ambayo Yesu aliwaambia bila kujali lolote. Bwana atarudi sasa katika hali uliyo nayo kubadili matatizo yako kuwa baraka. Wanawali wenye busara au hekima walimfahamu bwana wao jinsi alivyo. Nawasikia wakisema, “Sisi hatujali akichelewa, yeye ni mtu wa heshima na uaminifu, atalitimiza neon lake. Hawezi kutuacha wala kutusahau.” Kila wakati wanawali wenye busara walikuwa pamoja na

Mungu na Neno lake na Roho wake Mtakatifu kwa namna ambayo hakuna kitu cha kuwaondoa.

Sasa HEKIMA hii ni nini?

**Hekima ni kujua na kuutumaini ukweli kwamba msalaba wa Yesu ulifyonza uovu wote na kila kitu lazima kigeuke kuwa baraka.** Sheria ya uvutano inasema kwamba chochote kinachokwenda juu LAZIMA kirudi chini. Sheria ya Roho wa Uzima katika Kristo Yesu (Warumi 8:1-2) inasema kwamba umeachwa huru mbali na maovu yote, na sasa ni lazima upate baraka, KAMA unaamini.

Hekima ni kujua kwamba watu wote wamepatanishwa kwa njia ya Msalaba. Siyo tu watu bali pia mambo yote. “Na kwa yeye kuvipatanisha vitu vyote na nafsi yake akiisha kufanya amani kwa damu ya msalaba wake; kwa yeye, ikiwa ni vitu vilivyo juu ya nchi au vilivyo mbinguni.” (Wakolosai 1:20)

**Kupatanisha ni neno lenye nguvu. Itifaki ya Strongs** inalielezea neno hilo kuwa ni “kurejesha hali ya zamani ya mapatano.” Maana nyingine ya neno hilo ni, “kutengeneza, kurejesha katika hali nzuri ya mwanzo, kufanya amani kati ya pande mbili au makundi mawili yanayopingana.” **Kamusi ya Biblia ya Vines** inalielezea neno hilo kuwa ni, “kubadili hali ya uadui kuwa ya urafiki.” Msalaba wa Yesu Kristo unachukua “maadui” wetu wote, kwamba ni watu, pepo, mazingira, magonjwa, umaskini, kila kitu, na kuvibadilisha kuwa marafiki. Hii ni Hekima! Kristo aliyesulibiwa!

2 Wakorintho 5:18 inasema, “lakini vyote pia, vyatokana na Mungu, aliyetupatanisha sisi na nafsi yake kwa Kristo, naye alitupa huduma ya upatanisho;” Kwahiyo hii ndiyo huduma yetu hapa duniani, kuwachukua maadui wetu wote, kuwachovya katika damu na Msalaba wa Yesu Kristo, na kuwageuza kuwa marafiki. Nakwambia, kwa Neno la Mungu na kwa uzoefu wangu mwenyewe, kwamba jambo hili ni kweli, linafanya kazi, ukisimama imara.

**Hekima ni kufahamu kwamba Shetani ameshindwa kwa damu ya Yesu.** Ina maana gain kuwa na ushindi juu ya Shetani? Damu ya Yesu inatupaje sisi nguvu? “Basi, kwa kuwa watoto wameshiriki damu na mwili, yeye naye vivyo hivyo alishiriki yayo hayo, ili kwa njia ya mauti amharibu yeye aliyekuwa na nguvu za mauti, yaani, Ibilisi, awaache huru wale ambao kwamba maisha yao yote kwa hofu ya mauti walikuwa katika hali ya utumwa.” (Waebrania 2:14,15)

“Lakini tukiwa tumekufa pamoja na Kristo, twaamini ya kuwa tutaishi pamoja naye; tukijua ya kuwa Kristo akiisha kufufuka katika wafu hafi tena, wala mauti haimtawali tena.” (Warumi 6:8,9)

Mistari hii inasema kwamba Shetani “aliharibiwa”. Hiyo inamaanisha nini hasa? Anaonekana akikimbia huko na huko akifanya kazi ya kuwaharibu wengine.

**Neno kuharibu katika Itifaki ya Strongs limeelezwa kuwa ni:**

- 1) kusababisha kitu kisifanye kazi, kutokuwa na kazi, kutotenda chochote, kutofanya lolote.
- 1a) Kumfanya mtu au kitu kisiwe na manufaa tena
- 1b) Kumuondolea mtu nguvu, uwezo wake wa kuathiri na silaha zake.

**Wakati Yesu na wewe na mimi tulipofufuliwa kutoka katika wafu**, tulizaliwa tena kama uzao mpya usiotawaliwa tena na Shetani. Hana tena mamlaka juu yetu. Badala yake sisi ndio wenye mamlaka juu yake. Shetani alitumia nguvu zake zote juu ya Yesu pale Msalabani, lakini Yesu alifufuka baada ya pale. Shetani hana tena zana wala silaha.

Anaweza kumharibu mtu asiyemwamini Yesu, na anaweza pia kumdanganya mwamini, lakini tukijua kweli, hawezi kamwe kutudhuru. Ukweli ni kwamba, ameharibiwa. Tukisimama katika kweli, anachoweza tu kufanya Shetani ni kutudanganya. Shetani hana nguvu juu ya kiumbe kipya. Kiumbe kipya ni wewe na mimi!

“Naye ndiye kichwa cha mwili, yaani, cha kanisa; naye ni mwanzo, ni mzaliwa wa kwanza katika wafu, ili kwamba awe mtangulizi katika yote.” (Wakolosai 1:18).

**Ayubu sura ya 28 inaonyesha kwamba hekima ya kweli inapatikana hasa katika mateso.** Tunasoma hayo katika Ayubu 28:12 “Bali hekima itapatikana wapi? Na mahali pa ufahamu ni wapi?” Ninaamini kwamba jibu la swali hilo linaonyesha kuwa, miili yeu inapokufa, tunapopita katika bonde la uvuli wa “mauti” tunaweza kusikia hekima ya kweli. Tunasoma katika Ayubu 28:22 kwamba “Uharibifu na Mauti husema, Tumesikia habari zake kwa masikio yetu.” Mithali 11:2 pia inaunga mkono maneno hayo ikisema, “kijapo kiburi ndipo ijapo aibu; bali hekima hukaa na wanyenyekevu.”

**Haya ni maneno yenye uzima.** Tunahitaji kuyafahamu. Yatatufanya tuweze kustahimili mateso. Ndiyo, Yesu atarudi tena duniani, lakini pia atarudi kwa ajili yako sasa, kubadili tatizo lako kuwa baraka.

Mfano mzuri wa mtu aliyepata ushindi huu ni Danieli katika tundu la simba katika Danieli sura ya 6. Danieli alikuwa akimfuata Mungu kikamilifu na kwa sababu hiyo akateswa na maadui zake na maadui wa Mungu. Badala ya kutolewa katika tundu la simba, aliwashinda simba ndani ya tundu hilo. Matokeo yake ni kwamba maadui zake walishindwa kabisa.

“Mfalme akaamuru, nao wakawaleta wale watu waliomshitaki Danieli, wakawatupa katika tundu la simba, wao, na watoto wao, na wake zao, na wale simba wakawashinda wakaivunja mifupa yao vipande vipande, kabla hawajafika chini ya tundu. Ndipo mfalme Dario akawaandikia watu wa kabila zote, na taifa zote, na lugha zote, waliokaa juu ya uso wa dunia; amani na iongezeke kwenu. Mimi naweka amri, ya kwamba katika mamlaka yote ya ufalme wangu watu watetemeke na kuogopa mbele za Mungu wa Danieli; maana yeye ndiye Mungu aliye hai, adumuye milele, na ufalme wake ni ufalme usioharibika, na mamlaka yake itadumu hata mwisho. Yeye huponya na kuokoa, hutenda ishara na maajabu mbinguni na duniani, ndiye aliyemponya Danieli na nguvu za simba. Basi Danieli huyo akafanikiwa katika enzi ya Dario, na katika enzi ya Koreshi, Mwajemi.” (Danieli 6:24-28).

Siamini kama Danieli angefanikiwa na maadui zake kushindwa kama asingeingia katika tundu la simba.

**Wajibu wetu ni nini tunapokuwa katika kipindi cha kungoja?**

Kusimama kunahitaji tufanye kitu fulani, hatupaswi tu kukaa na kungojea. Waebrania 6:12 inasema, “Ili msiwe wavivu, bali mkawe wafuasi wa hao wazirithio ahadi kwa imani na uvumilivu.”

Ni lazima tuutunze “ubikira” wetu. Hii ina maana kwamba ni lazima tukae safi mbele za Bwana. Hatuhitaji kukaa na dhambi, badala yake tuziungame na kuwa safi mbele za Mungu na wanadamu.

**Naamini pia kwamba Biblia inatufundisha kwamba wakati wa kipindi hiki cha kungojea, tunahitaji kulitumia Neno la Mungu kama upanga.**

Waefeso 6:17b inasema, “Na upanga wa Roho ambao ni Neno la Mungu.”

Tunaambiwa katika Waebrania 3:1 “Kwahiyo, ndugu watakatifu, wenye kuushiriki mwito wa mbinguni, mtafakarini sana mtume na kuhani mkuu wa maungamo yetu, Yesu,” Yesu huchukua maungamo yetu kwa Baba kama Kuhani wetu Mkuu, na Baba



huhakikisha kwamba hilo linafanyika, maadam ni Neno la Mungu. Adui naye huchukua maungamo yetu yaliyo kinyume na kufanya yale tunayosema.

**Tunapolikiri Neno la Mungu na kuomba** kwa kutumia Neno juu ya mtu au hali fulani, lina nguvu sana! Yesu aliumba kila kitu kwa Neno lake. Yesu NI Neno. Yesu alitupa mamlaka ya kutumia Neno kana kwamba ni Yeye anayelitamka!

**Yohana 1:1-3, inasema “Hapo mwanzo kulikuwako Neno,** naye Neno alikuwako kwa Mungu, naye Neno alikuwa Mungu. Huyu mwanzo alikuwako kwa Mungu. Vyote vilifanyika kwa huyo; wala pasipo yeye hakikufanyika chochote kilichofanyika.”

Pasaka ilipoadhimishwa na Wana wa Israeli katika Kutoka 12 , Wana wa Israeli waliambiwa kuweka damu ya mwana-kondoo asiye na ila juu ya milango yao na malaika wa mauti (pepo) “atapita juu” yao bila kuwadhuru. Yesu ni Mwana-Kondoo wa Mungu, tunaweza kuweka damu yake juu ya milango yetu na milango ya wapendwa wetu na juu ya wale tunaowaombea. Kwa njia gani?

Ufunuo wa Yohana 12:11 inasema, “nao wakamshinda kwa damu ya Mwana-Kondoo, na kwa neno la ushuhuda wao; ambao hawakupenda maisha yao hata kufa.”

**Maneno ya vinywa vyetu yataiweka damu.** Ukiangalia katika Kutoka 12 utaona kwamba ile damu iliyokaa tu ndani ya bakuli haikufanya lolote jema. Lakini walipochukua hisopo na kuichovya ndani ya damu na kisha kuipaka juu ya milango yao, hapo Shetani na Mungu walianza kuiona damu. Hisopo ulikuwa mmea wa kawaida tu ulioonekana hauna thamni. Maneno ya vinywa vyetu hayaonekani kuwa na thamani lakini tukiyachovya katika Neno la Mungu (ambalo ni Yesu mwenyewe) na kuyatumia kama damu, Mungu huyaona na pia Shetani huyaona!

**Yesu huchukua maungamo yetu na kuyafanya kuwa na nguvu sana.** Waebrania 3:1 “Kwahiyo, ndugu watakatifu, wenye kuushiriki mwito wa mbinguni, mtafakarini sana mtume na kuhani mkuu wa maungamo yetu, Yesu.”

**Tunapolitamka Neno la Mungu, Yesu hulipeleka kwa Baba na kumuomba alitende.**

Yohana 16:23 inasema, “Tena siku ile hamtauliza neno lolote. Amini, amini, nawaambia, mkimwomba Baba neno lolote atawapa kwa jina langu.”

**Hatimaye tunaweza kuingia katika raha na kuliacha Neno lifanye kazi.**

Waebrania 4:1 inasema, “Basi, ikiwa ikaliko ahadi ya kuingia katika raha yake, na tuogope, mmoja wetu asije akaonekana ameikosa.”

Waebrania 4:12 inasema, “Maana Neno la Mungu li hai, tena lina nguvu, tena lina ukali kuliko upanga uwao wote ukatao kuwili, tena lachoma hata kuzigawanya nafsi na roho, na viungo na mafuta yaliyomo ndani yake.”

**Malaika huenda kufanya kazi wanapolisikia Neno la Mungu.**

Zaburi 103:20 inasema, “Mhimidini Bwana, enyi malaika zake, ninyi mlio hodari, mtendao neno lake, mkiisikiliza sauti ya neno lake.”

**Pepo hutoka!**

Zaburi 149:5-9 inasema, “Watauwa na waushangilie utukufu, waimbe kwa sauti kuu vitandani mwao. Sifa kuu za Mungu na ziwe kinywani mwao, na upanga mkali kuwili mikononi mwao. Ili kufanya kisasi juu ya mataifa, na adhabu juu ya kabila za watu. Wawafunge wafalme wao kwa minyororo, na wakuu wao kwa pingu za chuma. Kuwafanyia hukumu iliyoandikwa; hiyo ndiyo heshima ya watauwa wake wote. Haleluya!”

**Kwa kweli, hii siyo nzuri hata kwa Shetani. Angalia jinsi Mungu anavyomtendea.  
Mtakanyaga nyoka!**

Neno la Mungu katika **Luka 10:19** linasema “Tazama, nimewapa amri ya kukanyaga **nyoka** na nge, na nguvu zote za yule adui, wala hakuna kitu kitakachowadhuru.”

Adui alishindwa hata kabla vita havijaanza. Biblia inasema katika Yohana 11:18-20 kwamba “Yohana akapiga vita siku nyingi na wafalme hao wote. Haukuwapo mji hata mmoja uliofanya amani na wana wa Israeli, isipokuwa ni wale Wahivi wenye kukaa Gibeoni; wakaitwaa yote vitani. Kwa kuwa lilikuwa ni la BWANA kuifanya mioyo yao kuwa migumu, hata wakatoka kupigana na Israeli, **ili apate kuwaangamiza kabisa, wasihurumiwe** lakini apate kuwaangamiza (maadui), kama vile BWANA alivyomwamuru Musa.”

**Endelea kutafakari juu ya tatizo lako baya kuliko yote. Sasa tafakari au angalia ahadi katika Neno la Mungu.**

**Sasa amua mwenyewe. Ni jambo gani linaloweza kubadilishwa, na lipi haliwezi kubadilishwa?**

**“Watu na wakushukuru, Ee Mungu, Watu wote na wakushukuru. Nchi imetoa mazao yake MUNGU, Mungu wetu, ametubariki.” (Zaburi 67:5,6).**